



*Dauid est repris par le Prophete Nathan, pour l'adultere, & homicide par luy commis, dont il fait penitence.*



**P**RES le peché de Dauid, le Seigneur luy enuoya Nathan, qui luy dist, Respond-moy vn iugement. Deux hommes estoient en vne Cité, l'vn riche, & l'autre pauvre; le riche auoit des bœufs & des brebis en grand nombre, & le pauvre n'auoit qu'une brebis qu'il auoit nourrie. Or le riche pour festoyer vn estrangier, espargnant les siennes, vint raur la brebis du pauvre. Lors Dauid fort courroucé dist à Nathan; Le Seigneur vit; cét homme est fils de mort, & la rendra au quadruple. Alors Nathan dist à Dauid, Tu es cét homme qui as fait cela; le Dieu d'Israël dit cecy: Le t'ay oingt Roy sur Israël, & t'ay déliuré des mains de Saül, & t'ay donné la maison, & les femmes de ton Seigneur en ton sein, & la maison d'Israël & de Iuda, & tu as fait mal en ma presence, & as mis à mort Vrie par l'espée, & as pris pour femme Bersabée sa femme: pour laquelle chose l'espée ne sortira point de ta maison, pource que tu m'as déprisé, & as pris la femme d'Vrie: tu as le tout fait secretement; mais il sera manifesté à tous ceux d'Israël, & en la presence du Soleil. Et Dauid dist à Nathan, J'ay peché au Seigneur, & Nathan dist, Aussi le Seigneur dit, J'ay transferé ton peché, tu ne mourras point, mais le fils nay de Bersabée mourra. Ce qui auint comme le Prophete auoit dit.